

Inatsisartut Suleriaasianni § 37 imm. 1 naapertorlugu Naalakkersuisunut apeqquut imaattoq matumuuna saqqummiuppara:

**Naalakkersuisunut apeqquut:**

- 1. Kommune-ni socialborgmester-eqartitsisimanermi misiliisimanerit qanoq paasisaqarfigineqarsimappat?**
- 2. Kommune-t inunnik isumaginninnermut sulianut tunngasunik borgmester-eqartitsisinnaalissappata, Inatsisit suut allanngortinneqassappat?**
- 3. Apeqquutigineqartup aappaani (2) oqaatigineqartutut aaqqiisoqassappat, tamanna allaffissornikkut aningaasaqarnikkullu qanoq kinguneqarsinnaava?**

(Inatsisartunut ilaasortaq Anthon Frederiksen, Partii Naleraq)

**Tunngavilersuut:**

Maani nunatsinni kommunit iluini aqutsinermi, ataatsimiisitalianut maannamut pisinnaatitsisarneq aallaavigalugu aaqqissuussisoqarsinnaasarsimavoq, tassa kommunalbestyrelse ataatsimiisitalianik assigiinngitsunik pilersitsiguni, ataatsimiisitaliat pisinnaatitaafimmi iluini kommunalbestyrelse sinnerlugu aaliangiisnaatitaasarluni.

Inatsisartut inatsisaat kommunit aqunneqarnerat pillugu (aqutsinermut inatsit) taamatut periarfissiivoq. Inatsisartut inatsisaanni §33-imi aaliangersagaqarpoq kommunalbestyrelse aqutseriaatsimik ataatsimiisitaliatigut aaliangiisarnermit allaanerusumik aaqqiisinnaaneramik periarfissaqarpoq, tamannalu inatsisitigut allatut aaqqissuussisinnaanermik tunngaviliivoq, kisiannili uanga nammineq paasinninnera naapertorlugu aaliangersakkap taassuma siunertaraa aningaasaqarnermut ataatsimiisitaliamik pilersitsisoqarsimatillugu kisiannili ataatsimiisitalianik allanik pilersitsisoqarsimatinnagu periarfissaasoq, taamaattoqartilluguli suliani allani tamani kommunalbestyrelse tamarmiusoq kisimi aaliangiisnaassuseqartarpoq.

aaliangiisarnermut tunngatillugu aaqqissuussami ”rådmænd”-inut imaluunniit ilaannakuusumik tamakkiisumilluunniit aaqqissuussisoqassappat, sammisamut aaliangersimasunut borgmesterinut

kingunereratarsinnaasaasa ilagaat aqutsinermi inatsit naapertorlugu borgmesterip aaliangisinnaatitaaneranut qalleraatilersinnaammat.

Magistratitut aqutsinertut ittut ilaannakuusumik tamakkiisumilluunniit nunatsinni atugaanerat takornartaanngilaq, tassami Nuup kommunerisimasaa ukiut arlallit matuma siornatigut inunnik isumaginninnermut sulianut tunngasunik borgmestereqartitsisimavoq. Uangalu paasinninnera naapertorlugu taamatut aaqqissuussineq misileraanertut ilusilerneqarsimavoq, tassani Inatsisartut inatsisaanni normu 6, 6. november 1997-imeersumi kommuneni aaqqissuusinerit pillugit inatsimmi, ukiut pingasut ingerlaneranni misileraasinnaanissamik inatsisitigut periarfissiisutaammat, taannalu 2001-ip naanerani periarfissatut atuutinneqarunnaarpoq.

Maannamut ilisimasakka naapertorlugit nunatsinni kommunet inunnik isumaginninnermut sulianut tunngasunik borgmestereqartitsisimangillat. Inatsisit atuutsinneqartut taamatut aaqiinissamut periarfissiinnngimmata.

Kommunemut qinersinermi kingullermi inunnik isumaginninnermut sulianut tunngasunik borgmestereqartitsinissamik eqqarsaat puttallartinneqaaqippoq.

Paasisinnaalluarpakka taamatut kissaateqartoqarpat, isumaqarpungali kommunalbestyrelseni ataasiakkaani isumaginninnermik ataatsimiisitaliamik pilersitsisoqassanersoq imaluunniit inunnik isumaginninnermut sulianut tunngasunik borgmestereqartitsissanerlutik nammineq aaliangiinissaminnut periarfissaqartariaqartut: Kommuneni ataasiakkaani isumaginninnermik ataatsimiisitaliat suliarpassuarnut tunngatillugu aaliangisariaqartarput, sulianilu ilaatigut pingaaqisuni sukkanerpaamik aaliangiisinnaanissaq pisariaqartarpoq. Suliat ilaat ataatsimiisitaliamit aaliangerneqartussaattillugit piffissaq ataatsimiisitaliamik aggersaanermik atortariaqartarsinnaasarpoq. Inunnik isumaginninnermi sulianut tunngatillugu aaliangigassat inunnik isumaginninnermut sulianut tunngasunik borgmestereqartitsinermi sukkanerumik aaliangerneqarsinaagaluarput, suliallu suliarinera taamaalilluni sivikinnerusinnaalluni tamatumalu kingunerissallugu meeqqanut, utoqqarnut, innuttaasunullu atukkatigut arlaatigut nammakkerneqartunut ikiuinissap ikorfartuinissallu inuiaqatigiit pisussaaffiata sukkanerumik pisarnissaa isumannaarneqassalluni.



Eqqarsaatersuutit siunertamut qulaani nassuiarneqartut matumuuna apeqqutit saqqummiunneqarput, periarfissat kingunerisinnaasasaasa paasisaqarfiginerunissaat angorusullugu.

Naalackersuisut akissutissaat qilanaaralugu.

Apeqqutit ullut suliffiit qulit (10) qaangiutsinnagit akineqarnissaat kissaatigaara.